

E importancia mitologico di Dia di Betico



Dia di Betico ta un dia sumamente importante pa comunidad di Aruba, y esaki ta pasobra por argumenta cu Betico Croes ta un di e marcanan cultural mas importante pa un identidad Arubiano. Den su tesis titula, "Betico Croes como un heroe mitologico di Aruba", teologo Pilar Flores ta argumenta riba e importancia di celebra Dia di Betico cada aña.

Por parce cu e celebracionnan di Dia di Betico ta manera cualquier otro fiesta nacional, pero tin algun aspecto cu ta haci e dia aki diferente. E storia di Betico Croes tin un significado special pa e identidad di Aruba como nacion. E caracteristicanan di Betico Croes – su idealnan, su soñonan, su manera di papia, bisti y trata hende – ta mara na e idealnan di kico un Arubiano ta y kico Aruba ta.

Esaki ta haci cu Betico Croes tin un rol importante den e mitologia di Aruba como nacion, den e identidad di Pais Aruba como tal.

Y pa por perpetua esaki, ta necesario pa mayoria di Arubiano participa den e celebracionnan di Dia di Betico. E argumento for di punto di bista mitologico ta esaki: Cada biaha cu hende ta reuni den un grupo na un localidad specifico pa recrea y recorda eventonan historico specifico, esaki ta yuda e generacion nobo pa sinti su mes personalmente conecta na e evento, uno cu nan no a biba personalmente. E energia di e multitud, tur enfoca riba un solo cos, como tambe e sitio (transforma den espacio sagrado door di e acto di recrea), ta sirbi pa crea un memoria, cu ta comosifuera e persona a experimenta e suceso personalmente for di e prome biaha cu el a sucede.

Pues door di bay Plaza di Betico hunto, bistiendo bandera di Aruba y cantando nos himno nacional, mientras ta scucha e discursonan di Betico Croes riba speaker y mirando videonan antiguo riba pantaya grandi, cada persona presente por sinti como si e cosnan aki tabata pasando awo, na e momento aki. Nos ta sinti conecta. E mito di Betico Croes ta bin na bida den tur y cada un di nos.

E ta traduci nos lucha actual den e lenguahe di nos origen. Un biaha mas, nos, e isla chikito pero fuerte, luchando balente pa defende y exige loke ta di nos pa derecho, cu amor pa nos pais y nos pueblo. E ta un di e momentonan mas definitivo pa cada Arubiano, e momento den cual nos por a cuminsa yama nos mes Arubiano y zwaai nos propio bandera.



No tin ningun otro evento riba su mes cu por sirbi e mesun proposito (hunto cu 18 di Maart), socialmente, pa Aruba. Ta esencial pa nos honra e tradicion aki y celebra Dia di Betico fielmente y consistentemente. Nos mester hacie pa renoba nos patriotismo, pa renoba nos identidad y pa crea un anker

social fuerte pa e futuro generacionnan. Y esaki no ta un responsabilidad cu nos por laga cay.

Idealmente, nos tur mester haya un dia liber pa celebra y recorda. Mientras mas hende bay na e celebracionnan, e mito ta bira mas fuerte.

Feliz Dia di Betico!

